



PRIMEIRO MINISTRO

**DISKURSU SUA ESELÉNSIA PRIMEIRU-MINISTRU
REPÚBLIKA DEMOKRÁTIA TIMOR-LESTE,
DR. RUI MARIA DE ARAÚJO,
IHA BIBAN SORUMUTU HO PARSEIRU DEZENVOLVIMENTU
TIMOR-LESTE NIAN SIRA, TINAN 2016**

“Finansiamentu ba desenvolvimento sustentável iha Timor-Leste”

**Sentru Konvensaun Díli
4 jullu 2016**



Palácio do Governo,
Avenida Presidente Nicolau Lobato,
Dili, Timor-Leste

Eselénsia

Distintu Deputadu sira
Kolega Membro Governu sira
Dr. Mari Alkatiri, Prezidente Rejiaun Administrativa Espesiál Oe-cusse Ambeno no
Zona Espesiál Ekonomia Sosiál Merkadu Timor-Leste

Eselénsia

Diretora Rejionál OMS ba Rejiaun Sudeste Aziátiku
Sekretáriu-Jerál ODS nian
Reprezentante Korpu Diplomátiku nian, Organizaun Sociedade Sivil sira no Setor
Privadu nian
Reprezentante Parseiru Dezenvolvimentu sira
Delegadu g7+ sira

Distintu konvidadu sira

Señora no Señor sira,

Ksolok boot tebes mai ha'u bainhira bele tuir dala ida tan Sorumutu ida ho Parseiru Dezenvolvimentu Timor-Leste nian sira, ne'ebé, tinan-tinan, ita halibur malun – membru Parlamentu Nasionál sira, membru Governu nian sira, setor privadu no organizaun Sociedade Sivil nian sira – atu diskuti no fahe ideia kona-ba dezafiu hirak ne'ebé ita hasoru, kona-ba lisaun hirak ita aprende ona no kona-ba hahakat hirak tuir mai, ne'ebé sei lori Timor-Leste ba progresu ida la nakotu.

Ida ne'e mos maka Sorumutu ida ba da-uluk ho Parseiru Dezenvolvimentu Timor-Leste (TLDPM) nian, hafoin adopta tiha, iha tinan uluk, Ajenda foun ba Dezenvolvimentu Sustentável. País hotu-hotu iha mundu simu kompromisu atu bele alkansa to'o tinan 2030 objektivu 17, kona-ba Objektivu Dezenvolvimentu Sustentável sira, hodi bele hatan ba dezafiu hirak ita hasoru no populasau sira iha mundu rai klaran oras ne'e hasoru hela. Sai objektivu komum maka prosperidade, halakon moris kiak, luta hasoru dezigualdade no injustisa no hasoru alterasaun klimátika sira no kona-ba ida ne'e ha'u hakarak refere katak Timor-Leste oras ne'e haka'as-an hela atu bele alkansa ida ne'e.

Nu'udar Ita Boot sira hatene katak Ajenda foun 2030 nian hetan baze iha Objektivu Dezenvolvimentu Miléniu (ODM)ne'ebé maka hatudu dalan no fo inspirasaun mai ita nia esforsu sira entre tinan 2000 no 2015. Timor-Leste, hahú kedas iha restaura ninia independénsia iha 2002, nia hala'o esforsu ida maka'as tebes atu buka alkansa ODM hodi nune'e nia bele hadi'a moris no futuru ninia povu nian, tuir hakerek ona iha Planu Estratéjiku Dezenvolvimentu 2011-2030.

Lós duni katak Timor-Leste, hanesan mos país frájil hirak seluk ka país hirak hasoru konflitu, la atinji nein objektivu Dezenvolvimentu Miléniu nian ida. Konflitu no instabilidade halo ami sés-an tiha hosi dalam ba dezenvolvimentu no prosperidade no ami

sai hakiduk tiha ba kotuk. Ami nia istória hatudu duni katak dame ne'e lós kedas pre-kondisaun ida atu la'ó ba dezvoltimentu sustentável.

Maski nia hasoru dezafiu barak, maibe Timor-Leste hetan duni progresu hirak notávele ne'ebé bele mosu hafoin ami asegura kondisaun hirak ba dezvoltimentu: pás no estabilidade. Ho ksolok ami bele dehan katak ami la la'ó mesak. Ami nia dalan ba dezvoltimentu hetan apoiu no empeñu hosi ami nia amigu sira hosi comunidade internasionál, hosi ami nia parseiru dezvoltimentu sira, ne'ebé tulun tiha ona ami iha programa oin-oin no iha setor oin-oin. Hamutuk ita hadi'a duni buat balun hanesan numeru ema tau naran ba eskola hetok barak, hetok kuran tan numeru hosi inan no kosok-oan mate, hanesan moras tuberkuloze no malária, ne'e atu temi deit ezemplu balun.

Hanesan nasaun, ami hetan maturidade atu rekoñese ami nia fragilidade sira no atu defini prioridade sira hodi bele lori ami nia dezvoltimentu ba oin. Ami rekoñese mos ami nia sirkunstánsia hirak úniku no nesidade kona-ba atu apropiada ami nia planu ba dezvoltimentu sira. No bainhira ami hala'ó ida ne'e, ami bele ona transmite konfiansa ba ami nia parseiru dezvoltimentu sira, no ikusmai bele lori ami ba harí kooperasaun ida produtivu hodi la'ó ba ami nia dezvoltimentu.

No oras ne'e ami iha agenda foun ida kona-ba dezvoltimentu sustentável, ne'ebé aprova ona iha tinan kotuk, no permite atu país sira, hanesan Timor-Leste, bele habesik-an liu tan no hola fatin di'ak liu tan iha atu sira rasik bele konkretiza objektivu hirak global ne'e, hodi bele kontribui mos ba hetan susesu iha objektivu global hirak ne'e iha mundu.

Ami nia objektivu global atu hetan futuro ida di'ak, estabesele tiha ona iha tinan ida ne'e duni, bainhira ami nia país hetan tranzisaun iha governasaun istóriu ida, hodi fo ba jersaun foun oportunidade atu sira bele kaer ami nia país nia destin. Nune'e maka Governu Konstitusional ba da-VI introdúz ona reforma estratéjika hirak ne'ebé bele asegura no konsolida kontinuidade investimentu ba setor sosial, ekonómiku, infraestrutúra no boa-governasaun hosi Planu Estratéjiku ne'ebé ami trasa ona ba Timor-Leste.

Señora no Señor sira

Governu ba da-VI tau iha nia neon katak iha dezafiu barak atu hasoru. Ami haka'as-an servisu atu bele hadi'a prestasaun servisu públiku sira, atu promove diversifikasaun iha ekonomia no atu aumenta qualidade infraestrutúra sira hodi bele aumenta bein-estar no qualidade moris ami nia povu nian.

Iha área edukasaun, ami nia servisu sira fo liu ba atu harí pré-eskola sira, basá ita hatene katak tinan hirak uluk labarik nian, hanesan importante tebes atu nia bele hetan susesu ba ninia futuro. Ami hadia fali eskola hamutuk 500 hodi bele asegura katak ami nia ki'ik-oan sira bele hetan eskola ne'ebé sira presija atu aprende no bele hetan di'ak no ami kontinua fahe merenda skolár no ekipamentu ba eskola sira atu alunu no profesór sira bele hetan kondisaun di'ak bainhira hala'ó apredizajen no hanorin.

Implementa tiha ona mos Kurríkulu foun ba Ensinu Pré-Eskolár no ba Siklu 1º no 2º Ensinu Báziku nian nune'e mos profesór sira hetan formasaun kona-ba konteúdu hosi korrikulu foun nian, atu nune'e bele hasa'e qualidade apredizajen nian.

Liu fali ida ne'e, no ho hanoin ida katak diferença entre kompeténsia hirak hetan hosi sistema ensinu kompara ho nesesidade hirak husu hosi merkadu servisu nian, oras ne'e prejudika hela ami nia klosan sira atu hetan servisu, ami hahú ona reajusta tranzisaun ba ami nia eskola sira hodi sai hosi eskola sekundária ba fali eskola hirak ho formasaun iha téknika no profisionál.

Kona-ba área saúde nian, oras ne'e ami implementa hela Pakote Komprensivu ba Kuidadu Saúde Primária no Programa Saúde iha Família ne'ebé atende ona família rihun ba rihun iha munisípiu sira hotu no ami konsege vasina, liu hosi Kampanha Nasional Vasinasau hasoru póliu, sarampu no rubéola, labarik porsentu 96% ho otas to'o tinan 15.

Governu mos foti ás hodi promove igualdade jéneru liu hosi kompromissu ne'ebé asina ho Deklarasaun Maubisse. Ami fiar katak ema fetor-an no fetu sira bele hola rasik sira nia desizaun iha ami nia desenvolvimento.

Importante mos atu realsa katak ami kontinua fo apoiu sosial ba labarik sira, ema adultu, ferik no katuas sira, ema deficiente sira no familia hirak mukit atu, liu hosi Programa Bolsa da Mãe, ema liu 50.000 bele hetan benefísiu.

Ami iha hanoin kona-ba importánsia boot tebes ba kreximentu ekonómiku no ba diversifikasaun ekonomia nian atu kria postu traballu no atu aumenta prosperidade ami nia povu nian. Tanba ne'e maka ami servisu atu kria kondisaun hirak nebe bele dada investimentu no hakbit empreza lokal sira liu hosi konstrusaun infraestrutura hirak esensial no lejislasau.

A construção de três grandes sistemas de irrigação e a conclusão de outros tantos; os mais de 430 hectares de floresta plantados; a manutenção e reabilitação de mais de 210 hectares de plantações de café e a extensão em cerca de 55 hectares desta plantação, o nosso produto mais exportado, são exemplos do trabalho realizado no setor da agricultura.

Kreximentu no desenvolvimento setor privadu sai boot bainhira ita haré ba sertifikadu liu 8.400 lisensa komérsiu nian maka fo-sai no hafoun tihaona no lisensa hirak besik 3.000 ba mikro négósiu nian maka fo-sai tiha ona.

Turizmu mos sai hanesan fonte diversifikasaun importante ida ba ekonomia no nia bele hamosu empregu no oportunidade ba ita nia povu. Ami hakarak hatudu ami nia país ba mundue ami hatene katak ami bele fo ba turista sira esperi'ensia hirak uniku no espesial. Tanba ne'e maka ami hahú implementa Programa Turizmu Komunitáriu atu ami bele hatene lolós katak povu sei hetan benefísiu hosi turizmu no ami mos sei hahú tinan ida ne'e ho estratégia nasional ida kona-ba turizmu nebe sei lori kreximentu ba setor ida ne'e.

Kriasaun ambiente favorável ida ba empreza sira, ita bele haré iha harí fábrica ba bebida hosi Heineken Ázia-Pasífiku, ne'ebé sei hahú ho ninia produsaun iha inísiu tinan oin mai, no fábrica simente TL Cement ne'ebé sei hahú harí iha inísiu tinan 2017.

Ami kontinua investe iha hadi'a ami nia infraestruturá sira no tanba ne'e maka ami oras ne'e hadi'a hela infraestruturá bázika sira iha área hirak hanesan ponte no estrada sira, we no saneamentu, enerjia elétrika, edukasaun no agrikultura no seluk-seluk tan, iha territóriu nasional tomak.

Planu Mestre sira kona-ba we no Saneamentu remata tiha ona iha munisípiu balun, nune'e mos hanesan harí hela-fatin 130 ne'ebé foin hahú no monta kontadór eletrisidade nian iha país tomak. Harí aeroportu Oe-Cusse Ambeno ne'ebé hahú ona no ami remata harí ona Sentral Elétrika Pante Makassar nian. Foin lalais ne'e asina tiha ona Parseria Públiku-Privada ba harí no opera portu foun Tibar nian, ne'ebé atu hahú iha tinan oin mai no sei fo empregu ba ema Timor-oan liu na'in 1000.

Governu mos rekoñese katak nia sei labele alkansa rezultadu no progresu sira bainhira la iha governasaun ida di'ak. Bainhira la iha transparénsia, prestasaun kontas, transparénsia no lideransa étika maka sei la alkansa dezvoltimentu sustentável. Tanba ne'e maka ami oras ne'e hala'o hela reforma iha área boa governasaun nian, hala'o hela auditoria sira ba ministériu sira no ba prestasaun servisu públiku sira no hala'o hela esforsu hotu-hotu atu kombat korrupsaun.

Ami nia dezafiu boot ida hosi dezafiu sira seluk maka dezvoltimentu rekursu umanu ne'ebé ami presija atu harí ami nia nasaun. Nune'e maka ami aposta iha hadi'a kualifikasaun ba ami nia kapital umanu hodi fo bolsa estudu liu 2.500 iha área saúde, enjeñaria, edukasaun no administrasaun públika no finansia ema liu 15.000 atu tuir programa formasaun téknika no especializasaun liu hosi Fundu Dezvoltimentu Kapital Umanu no, iha Programa Nasional kona-ba Estájiu nian ema na'in atus resin maka hetan facilidade.

No bainhira ami hala'o buat hotu-hotu ne'ebé ami bele atu dezvoltive ami nia país, ami mos hatene katak futuru sustentabilidade ami nia nasaun nian depende iha atu alkansa soberania ba ami nia tasi sira.

Maski ami hetan ona konkista boot ho ami nia independénsia, maibe limite ba ami nia tasi sira seidak defini. Ida ne'e halo ami nia setor peska, imigrasaun, turizmu no rekursu sira hetan prejuízu.

Ami kontente tebes tanba ami nia belun ida besik liu, Indonésia, konkorda ona atu negoseia fronteira marítima sira, hodi hala'o tiha ona diskusaun sira. Maibé Austrália, la hatan atu negoseia fronteira marítima permanente, no impede netik atu ami nia kazu bele hetan julgamentu liu hosi juiz independente ida.

Ami labele hili no ami obrigadu tenke hahú ho prosesu konsiliaun obrigatóriu ida, tuir Konvensaun Nasoens Unidas kona-ba Direitu ba Tasi. Maski prosesu ida ne'e uluk seidak

buka atu halo, maibé ami fiar katak iha regra nebe bazeia ba arkitektura mundiál, nune'e mos ba importánsia direitu internasionál nian ba rezolve disputa sira no ba protéje pás no prosperidade mundiál. Nune'e maka hodi respeitu boot ba ami nia país amigu, Austrália, ami husu atu Governu ida tuir mai bele haré ba Tasi Timor ho matan seluk ida, no ita tenke servisu hamutuk atu rezolve ita nia disputa no atu manan kredibilidade iha harí pás no prosperidade iha iota nia rejiaun.

Definisaun definitivu ba ita nia froteira marítima sira maka sai hanesan hakat ida finál ba Timor-Leste atu realiza ita nia soberania plena; sai vital mos mai ami nia autosufisiénsia atu ami bele hasoru dezafiu boot sira iha ami nia desenvolvimentu no la iha ema maka tonka liman.

Señora no señor sira

Timor-Leste to'o oras ne'e buka hela atu diversifika no dinamiza ninia ekonomia, hodi halo ekonomia hetok menus depende ba reseita rekursu mina-rai nian sira. Iha tina uluk, iha biban ida hanesan ne'e, ami koalia kona-ba reforma lubun ida ne'ebé Governu oras ne'e hala'o hela, ne'ebé sai mos hanesan insentivu ida ba investimentu no tanba ida ne'e kontribui ba desenvolvimentu sisténtável no ba sustentabilidade fiskál ami nia país nian.

Ha'u hakarak atu fo hanoin, señora no señor sira, katak reforma lejislativa sira no setor justisa nian; reforma administrasaun públika; reforma fiskál; no reforma no fomentu ekonómiku maka sai nu'udar esensial ba Timor-Leste no impaktu boot ida ba ami nia parseiru desenvolvimentu sira no ba ami nia investor sira.

Komisaun Reforma Lejislativa no Setor Justisa to'o oras ne'e servisu atu hadi'a kapasidade setor lejislativu no judisiáriu hodi bele garante no protéje direitu sidadaun sira nian atu hetan justisa.

Ami harí tiha ona Komisaun ba Reforma Fiskál, ne'ebé iha ona planu implementasaun ida aprovalu, ne'ebé hahú analiza ona proposta lejislativa sira, kona-ba prosedimentu no polítika fiskál sira ne'ebé permiti atu aumenta reseita sira.

Reforma Administrasaun Públika mos hetan ona ninia Guia Reforma nian aprovalu ona. Guia ida ne'e haré kona-ba fortaleimentu institusionál no funsaun públika, reforma no kapasitasaun INAP nian no reforsu iha kontrola jestaun administrativa, finanseira no patrimoniál Estadu nian, hodi kria kondisaun hirak dia'k atu ami nia administrasaun públika bele tau ba prátika ninia kompeténsia sira no bele lori Estadu atu bele presta servisu ida efisiente, efikáz no responsável.

Iha faze implementasaun nian ita bele hetan mos Guia Reforma nian no Fomentu Ekonómiku, ne'ebé koordena hosi Estrutura Koordenasaun Ekonómika hanesan responsável ba implementasaun medida hirak konkretu iha ninia ezekeusaun.

Buat ida tan. Iha hahú ami nia governasaun, no atu hadi'a monitorizasaun no avaliasaun ba ezekeusaun oráriu públiku nian, ami hanoin katak presija estabese unida Planeamentu, Monitorizasaun no Avaliasaun ida iha Governu tomak atu nune'e bele iha ligasaun di'ak ida

entre planeamentu, orsamentu no implementasaun. Bainhira ligasaun ne'e hetok sai di'ak entre planeamentu, orsamentu no implementasaun, maka impaktu ba ita nia medida sira ba moris ita nia populasau nian sei sai boot liu tan.

Hanesan ezersisiu ida ne'ebé oras ne'e tau hela iha prátika no bele haré ona iha orsamentu ba tinan 2017 nian. Hanesan ezersisiu ida ne'ebé sei hamosu liu tan transparénsia no prestasaun kontas ida ne'ebe sai di'ak liu tan, la'os deit iha investimentu maibé mos iha efikásia iha ajuda, no sai instrumentu importante ida iha monitorizasaun no definisaun prioridades sira, nune'e sai mos ferramenta aliñamentu di'ak ida entre Governu no parseiru dezvoltimentu sira.

Señora no señor sira

Ita bele kongratula malun tanba buat hotu ne'ebé ita konsege alkansa ona hodi rai iha neon kona-ba buat barak ne'ebé sei resta atu to'o ba objektivu hirak ne'ebé ita kompromete-an ona atu atinji, no ita kongratula malun mos tanba ita hatene katak to'o oras ne'e ita la mesak deit servisu atu hetan ita nia fin sira. Servisu ida hamutuk ne'ebé ita hala'o to'o oras ne'e ho apoiu hosi povu, hosi sociedade sivil, hosi setor privadu no hosi ita nia parseiru dezvoltimentu sira sai hanesan motivu orgullu nian ida mai ita hotu no nafatin sai orgullu bazeia ba konfiansa mútua no resiprosidade ne'ebé ita hakarak kaer hodi la'o to'o dalan rohan.

Objektivu hirak atu ita hetan hosi Ajenda foun Dezvoltimentu Sustentável 2030 nian la sai deit hanesan dezafiu ida maibé dezafiu barak, ne'ebé bainhira ita konkretiza nia bele lori benefisiu, la'os deit ba povu no nasaun ida, maibé mai ita hotu. Tanba ne'e maka ita hetan vokasaun atu kontribui hodi konkretiza objektivu sira ne'e.

Timor-Leste oras ne'e haka'as-an atu realiza meta no indikador sira ne'ebé konkorre ba Objektivu Dezvoltimentu Sustentável. Loron balun molok atu país Nasoens Unidas nian sira atu adopta nia, Konsellu Ministrus hahú aprova Rezolusaun ida hodi adopta ODS no reforsa tan hosi Parlamentu Nasionál, hodi sujere ba Governu atu aliña ODS ne'e ho prosesu planeamentu no orsamentu.

No atu kesi ita nia kompromissu mka, Governu kria ona Klibu Traballu ida ne'ebé responsável ba halo mapa kona-ba operasaun objektivu sira ne'e nian no habelar ba país tomak, liu hosi koordenasau no konsultasau ida metin entre instituisau governu nian sira, organizasau sociedade sivil nian sira no ho parseiru dezvoltimentu sira, atu bele mos monitoriza no apresenta rezultadu sira kona-ba ninia implementasaun.

Nune'e maka ami buka atu harmoniza objektivu hirak ne'e bainhira ami hala'o ami nia planeamentu no orsamentasau ba tinan 2017, hodi liga Planu Estratéjiku ba Dezvoltimentu no Programa Governu nian. Ami mos hafoin avaliasau ne'ebé oras ne'e hala'o hela kona-ba tinan lima da-uluk implementasau PED nian, no besik atu remata ona, sei inklui Objektivu sira hosi Dezvoltimentu Sustentável iha revizaun ba ami nia Planu Dezvoltimentu hodi bele aliña di'ak liu tan ho impaktu ida boot liu no transversal ba ami nia populasau. Atu to'o iha ne'ebé, iha faze konsulta da-rua nian, ami hakarak envolve besik

liu tan setor privadu no autoridade lokal sira, hosi munisípiu sira liu hosi Postu Administrativu to'o Suku sira, tanba importante iha prosesu ida ne'e.

Iha prosesu atu hadi'a ligasaun ida ne'e entre planeamentu no orçamentasaun ne'ebé to'o oras ne'e hala'o hela to'o remata, hamutuk tan ho operacionalizasaun no mapeamentu ODS, hamosu mos definisaun kona-ba priridade Governu nian sira ba 2017: agrikultura (kombate hasoru hamlaha no malnutrisaun); saúde; edukasaun; we no saneamentu; infraestrutura hirak bázika no eleisaun iha tinan oin mai.

Tanba ne'e maka ho ligasaun ida ne'e ho ODS, iha 2017 Governu sei foku liu ba obketivu 2 (nutrisaun no seguransa alimentár), 4 (edukasaun) no 9 (infraestrutura). Iha prazu badak, Governu nia atensaun sei monu iha objektivu dezenvolvimentu umanu nian sira seluk hanesan saúde (objektivu 3), igualdade jéneru (objektivu 5) no we no saneamentu (objektivu 6). Ida ne'e la inklui objektivu 7 to'o 15 ne'ebé mos hetan fatin iha esforsu Governu nian ba prazu badak, médiu no naruk. Hanesan komulativu foku ba Objketivu 2 to'o 15 , hamutuk ho esforsu hirak ba Objketivu 16 to'o 17, sei lori Timor-Leste ba hetan Objketivu nº 1 iha 2030, ne'ebé bele hatan ona vizaun ne'ebé maka hakerek iha Planu Estratéjiku Dezenvolvimentu 2011-2030.

No bainhira hanoin fali katak *focus* global hosi Objektivu sira Dezenvolvimentu Sustentável nian maka "P 5" – **Pessoas (ema); Planeta (Rai); Prosperidade, Pás no Parseria** – maka ami hili hanesan tema prinsipál sorumutu nian ho ami nia Parseiru Dezenvolvimentu nian sira maka "Financiamentu ba dezenvolvimentu sustentável iha Timor-Leste", ne'ebé ninia objektivu maka atu reafirma ami nia kompromisu iha implementa ODS iha nível nasional no atu koalia kona-ba ninia forma finansiametu ida di'ak liu. Atu ami bele hetan buat hirak ne'e hotu, ami presija iha rekursus sira – ami nia rekursu rasik, ami nia reseita rasik ne'ebe ami bele konsagra iha dezenvolvimentu sustentável ba ami nia povu, nune'e mos rekursu hirak suplementár kona-ba dezenvolvimentu no kona-ba instituisaun filantrópiku sira no kona-ba setor privadu.

Ami fiar katak ho revizaun, aliñamentu no harmonizasaun Planu Estratéjiku Dezenvolvimentu ho ODS no ho instrumentu hirak ami kria atu hetan ligasaun ida di'ak liu entre planeamentu, orsamentu no implementasaun, ami harí senáriu ba diálogu ida di'ak liu kona-ba mobilizasaun rekursu finanseiru adisionál sira atu bele apoia dezenvolvimentu sustentável iha Timor-Leste.

Liu hosi esforsu sira atu mobiliza rekursu internu sira hodi bele implementa Planu Dezenvolvimentu Estratéjiku 2011-2030 no ODS, maka oras ne'e ami hetok iha hanoin ida katak ami labele dependente bebeik, la'os deita ba ami nia parseiru dezenvolvimentu sira maibe mos ba ami nia rekursus minarai no gás. Nune'e maka iha tinan liu ba ami loke reforma barak, hanesan fiskál, ekonómika, administrasaun públika no reforma lejislativa, hodi bele diversifika ami nia ekonomia, hodi dada investimentu privadu nasional no estranjeiru sira.

Maski nune'e, ami mos hatene katak la fasil atu dada investimentu setor privadu nian ba país ida frájil ka foin liu hosi konfliktu tanba risku hirak asosia ho instabiolidade polítika no

governasaun. Modalidade atual "blended finance" nian bele sai nu'udar solusaun ida ba ida ne'e no Timor-Leste ansi atu aprende liu tan kona-ba ida ne'e no envolve-an liu tan iha diskute kona-ba modalidade atu mobiliza rekursu sira.

Señora no señor sira

Hela deit ha'u atu agradese ba imi hotu ne'ebé to'o oras ne'e servisu hamutuk ho Timor-Leste no apoia ona ami iha nivel oin-oin no iha setor oin-oin iha ami nia prioridade nasional sira. Ha'u mos hakarak atu dala ida tan afirma importánsia servisu nian ne'ebé to'o oras ne'e ita hala'o ona no lori ona progressu ba ami nia povu no ami nia país.

No tanba oras ne'e ita hamutuk iha sorumutu kona-ba finansiamentu ba dezvoltimentu sustentável Timor-Leste nian, maka ha'u hakarak atu lora ida ne'e bele mos sai hanesan lora atu ita hanoin hikas lora "fo-sai ODS simbóliku iha Timor-Leste", ne'ebé ita maka testemuñu iha envolvimentu no kompromissu hirak hosi instituisaun ida-idak ne'ebé ita reprezenta hodi bele asume objektivu global sira ne'e.

Karik bele "ita sai ida ba hotu, no hotu ba ida"!
Obrigadu barak.

4 julu 2016
Dr. Rui Maria de Araújo